

佛说摩达国王经 1 卷

No. 519

佛说摩达国王经

宋居士沮渠京声译

闻如是：

一时，佛在罗阅祇竹园中，与千二百五十比丘俱。

时有国王，号名摩达王，时当出军征讨，选国中人民，数百万人，皆应赴从。

时有比丘，已得罗汉道，到其国分卫，并见录，将诣王宫门。王有马监，令比丘养视官马，勤苦七日。王后身自临视军阵，比丘见王，即于其前，轻举飞翔，上住空中，现其威神。王便恐怖，叩头悔过：「我实愚痴，不别真伪，推问国内，谁令神人为是者，今当有所治杀。」

比丘告王言：「非王及国人过也，自我宿命，行道常供养师，我时为师设饭，师谓我言：『且先澡手已乃当饭。』我愚痴，心念言：『师亦不养官马，何故不预澡手？』师即谓我言：『汝今念此轻耳，后重如何？』我闻是语，便愁忧。师知其意，便念言：『我会当泥洹，何故令人恼耶？』即以其夜三更时般泥洹。从来久远，各更生死，今用是故，受其宿殃，养马七日。夫善恶行，辄有殃福，如影随形。」

王闻比丘说罪福，意解欢喜，乞得归命于神人。比丘告言：「卿当自归于佛，佛为三界师。」

王及国人民，皆随比丘到佛所，稽首为佛作礼，受五戒作优婆塞。佛便为王及人民，现相好威神，光曜天地，复为说无常苦空。王于是便得须陀洹道，国中人民，皆受五戒十善，归命三尊，月日斋戒，以为常法。

阿难整衣服，作礼白佛言：「是王及国中人民，见佛闻经即解。何以故？」

佛言：「及昔摩父佛时，是比丘作沙门，王时为优婆塞，净意供养三日，令我所在处常得其福，今已得度世之道，今来会此，闻经便得须陀洹道。」

四辈弟子、天龙鬼神，闻经欢喜，前为佛作礼而去。

佛说摩达国王经

【经文信息】大正藏第 14 册 No. 0519 佛说摩达国王经

【版本记录】CBETA 电子佛典 Rev. 1.8 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，阎学新大德输入 / 沈介盘大德校对，北美某大德提供，Jasmine 提供新式标点

【其他事项】本数据库可自由免费流通，详细内容请参阅【中华电子佛典协会数据库版权宣告】
